



KOPI PAHIT

Tiap-tiap hari Radio Malaysia Kuala Lumpur, waktu Maghrib, menyiaran azan untuk pemeluk-pemeluk Islam di daerah Kuala Lumpur dan sekitarnya. Ini baik sekali. Lepas sahaja azan, disambut dengan gembus dan selalunya diadakan terus disambung dengan syarahan ringkas yang berunsur agama Islam. Kita berfikir waktu itu waktu Maghrib, orang sembahyang, lepas sembahyang barangkali ada yang mahu berzikir atau ratib – jadi siapa orang yang mendengar syarahan dan kepada siapa syarahan itu ditujukan? – Perhatilah masa dan ketikanya supaya memberi faedah dapat didengar oleh semua orang.

* * *

Dahulu, orang-orang Melayu boleh berkata, bahawa Melayu itu Islam kerana masa dahulu dijamin seratus-peratus setiap orang Melayu itu beragama Islam, sejaht-jahat orang Melayu, mereka tidak mahu menukar agamanya, tetapi sekarang apa bolehkah kita berkata bahawa Melayu itu Islam kerana ada di antaranya, walaupun seorang dua, yang sudah menukar agamanya kepada agama Kristian dan Buddha. Inilah kesan kemajuan beragama!

* * *

Askar-askar Turki yang ikut atau ditugaskan oleh Bangsa-bangsa Bersatu ke Korea Selatan, sebagai tentera Islam, tidak sahaja bertugas memegang senjata, tetapi juga mereka bertugas di lapangan dakwah Islam, kerana dengan

jasa mereka adanya umat Islam di Korea Selatan dan kemudian terdirilah cogan Islam, sebuah masjid Islam di sana. Agama rasmi kerajaannya tidak ditetapkan agama Islam, tetapi Malaysia yang agama rasmi negaranya Islam, di dalam sebuah berita, apabila membuka bangunan baru kedutaan Malaysia, maka untuk ((tepung tawarnya)) dipanggil sami Jepun. Di manakah tugasnya Islam kepada mereka dan kepada negara?

* * *

Pada suatu hari khalifah ‘Umar bin Abd al-Azīz dibawakan kepadanya – sebagai hadiah – beberapa biji buah epal. Buah itu disampaikan oleh iparnya dan kemudian ditimang-timang oleh beliau lalu membungkus dan mengembalikannya kepada iparnya dan berkata: Bahawa pemberian ini bermakna ((rasuah)) kepadaku, kerana apabila aku menerima terpaksalah aku mengenang budimu. Kalau buah epal telah ditolak sebagai rasuah, apalagi... En. Harun mesti membaca sejarah Khalifah ‘Umar bin Abd al-Azīz ini, sampai dapat menghukum orang-orang yang memakan rasuah dengan tidak memandang bulu, sama ada dia ketua negara apalagi rakyat jelata.

* * *

Menurut berita akhbar, kerajaan Israel akan menjual kereta-kereta kebal kepada Singapura untuk kelengkapan perangnya. Singapura yang lebarnya hanya 14 batu persegi itu hendak dilengkapkan dengan tank – orang lalu bertanya? Pertanyaan ini lebih-lebih lagi apabila berita itu menyebut bahawa orang-orang Israel adalah menjadi juru latih dan penasihat tentera mereka. Apakah sebab pertanyaan ini timbul? Tentunya kerana ((Tuan Guru)) orang yang berjiwa agresif – tentu mahu serang sahaja dengan alat-alatnya kepada siapa dan untuk siapa? Entahlah